



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA
Broj:02-011- 1752/'03
Sarajevo, 10.12.2003.god**

ZAPISNIK

**15. sjednice Doma naroda Parlamentarne skupštine Bosne i Hercegovine,
održane 10. decembra 2003.god.**

Sjednica je počela sa radom u 11,10 sati.

Sjednicom je predsjedavao prvi zamjenik predsjedavajućeg Doma naroda Parlamentarne skupštine Bosne i Hercegovine, Goran Milojević

Na sjednici je bilo prisutno 12 delegata.

Delegati Hilmo Neimarlija, Mustafa Pamuk i Anto Spajić su opravdali izostanak.

Osim delegata na sjednici Doma naroda bili su prisutni: predstavnici Vijeća ministara, predstavnici međunarodnih organizacija, pozvani gosti i predstavnici sredstava javnog informisanja.

Dom naroda usvojio sljedeći dopunjeni

DNEVNI RED

1. Odgovori na delegatska pitanja i delegatska pitanja
2. Izvještaj Zajedničke komisije o nastojanju za postizanje sporazuma o istovjetnom tekstu Zakona o vazduhoplovstvu Bosne i Hercegovine
3. Prijedlog Zakona o sistemu indirektnog oporezivanja, drugo čitanje – predlagač Vijeće ministara BiH
4. Zaključak Tomislava Limova – uslovi u kazneno – popravnim zavodima na području BiH utvrđenih u međunarodnim konvencijama

Ad-1: Odgovori na delegatska pitanja i delegatska pitanja

Odgovora na delegatska pitanja nije bilo.

Delegat Velimir Jukić postavio je sledeća pitanja:

Zašto kasni realizacija CIPS Projekta?

Hoće li doći do ubrzanja realizacije Projekta?

Kada možemo očekivati završetak realizacije Projekta CIPS?

Delegat Tomislav Limov:

U kojoj fazi su pregovori o saradnji između Bosne i Hercegovine i Evropolu i šta su dužni učiniti Predsjedništvo, Vijeće ministara i Parlamentarna skupština Bosne i Hercegovine kako bi bili ispunjeni uslovi za potpisivanje sporazuma o saradnji s Evropolom?

Delegat Boško Šiljegović:

- Problem plasmana poljoprivrednih proizvoda sa prostora Republike Srpske u gradu Sarajevu

Poljoprivredni i prehrambeni proizvodi iz Republike Srpske obavezni su za veterinarske preglede kako u mjestu proizvodnje, tako i na ulazu u grad, što poskupljuje svakodnevnu isporuku za 70-tak Km po vozilu.

Kao što Vam je poznato usvojen je Zakon na državnom nivou prema kojem je objedinjena Veterinarska služba.

Kome je u interesu da narušava jedinstveno tržište u BiH?

Delegat Osman Brka je postavio pitanje predsjedavajućem Predsjedništva BiH, Dragana Čoviću i ministru u Vijeću ministara, Bariši Čolaku.

“Šta znači, bez odluke državnih institucija Bosne i Hercegovine, prisustvo Dragana Čovića, predsjedavajućeg Predsjedništva BiH i Bariše Čolaka, ministra u Vijeću ministara, funkcionera države Bosne i Hercegovine, povodom otkrivanja spomenika u Širokom Brijegu, bivšem predsjedniku druge države, Republike Hrvatske, dr. Franji Tuđmanu”.

Ad-2: Izvještaj Zajedničke komisije o nastojanju za postizanje sporazuma o istovjetnom tekstu Zakona o vazduhoplovstvu Bosne i Hercegovine

U diskusiji su učestvovali Hasan Čengić i Goran Milojević.

Dom naroda jednoglasno je usvojio Izvještaj Zajedničke komisije o nastojanju za postizanje sporazuma o istovjetnom tekstu Zakona o vazduhoplovstvu Bosne i Hercegovine kao i zaključak Zajedničke komisije kojim se odobrava normativno – tehničko uređenja Zakona, saglasno usvojenim amandmanima.

Ad-3: Prijedlog Zakona o sistemu indirektnog oporezivanja, drugo čitanje – predlagač Vijeće ministara

U diskusiji su učestvovali: Boško Šiljegović, Zoran Spasojević, Hasan Čengić, Halid Genjac, Velimir Jukić, Jusuf Kumalić, predstavnik Vijeća ministara, Nade Radović, Vinko Radovanović, Ilija Filipović, Goran Milojević i Jadranko Tomić.

Dom naroda usvojio je Prijedlog Zakona o sistemu indirektnog oporezivanja sa sljedećim amandmanima:

▪ **AMANDMAN 1.**

U članu 2. stav 3. iza riječi Republike Srpske «, dodati riječ « kanton ».

▪ **AMANDMAN 2.**

Član 4. mijenja se i glasi:

“Uprava je odgovorna za provođenje zakona koji se odnose na indirektno oporezivanje u BiH, kao i politike koju utvrdi Vijeće ministara BiH na prijedlog Upravnog odbora i zakona i drugih propisa kojima je regulisana naplata i raspodjela prihoda od indirektnog oporezivanja u Bosni i Hercegovini”

▪ **AMANDMAN 3.**

U članu 7. dodaje se novi stav 4. koji glasi:

"Prilikom imenovanja rukovodećeg kadra vodiće se računa o nacionalnoj zastupljenosti ."

Dosadašnji stav 4. postaje stav 5.

▪ **AMANDMAN 4.**

U članu 11. prvi stav briše se riječ »pet«, a dodaje riječ «četiri», u istom članu drugi stav briše se riječ «petogodišnji», a dodaje riječ «četvorogodišnji».

▪ **AMANDMAN 5.**

U članu 14. tačka (ii) iza riječi « Republike Srpske « dodati riječ « kanton.»

▪ **AMANDMAN 6.**

U članu 21. stav 3. iza riječi « Republike Srpske dodati riječ « kantoni», a iza tačke (i) dodaje se nova tačka (ii) koja glasi «da se iznosi koji pripadaju kantonima prenosu na njihov budžet «.

Dosadašnja tačka (ii) postaje tačka (iii), a dosadašnja tačka (iii) postaje (iiii).

▪ **AMANDMAN 7.**

U članu 28. stav prvi red 2. briše se riječ «ne» i red četvrti, briše se riječ «ne». Stav 2. prvi red briše se riječ «pet» umjesto te riječi piše se riječ «četiri».

▪ **AMANDMAN 8. -**

U članu 35. ispred prvog stava dodaje se "stav".

Za svaku navršenu godinu od stupanja na snagu ovog Zakona izvršiće se revizija poslovanja uprave od strane ureda za reviziju Bosne i Hercegovine.

Kako je Zakon usvojen u različitom tekstu u Predstavničkom domu, formirana je zajednička komisija za postizanje sporazuma o istovjetnom tekstu Zakona. U zajedničku komisiju iz Doma naroda imenovani su: Osman Brka, Zoran Spasojević i Ilija Filipović.

Ad-4: Zaključak Tomislava Limova – uslovi u kazneno – popravnim zavodima na području BiH utvrđenih u međunarodnim konvencijama

U diskusiji su učestvovali: Ilija Filipović, Osman Brka i Hasan Čengić

Dom naroda jednoglasno je usvojio sljedeći zaključak Ustavno – pravne komisije: Uslovi u kazneno - popravnim zavodima na području Bosne i Hercegovine utvrđenih u međunarodnim konvencijama koji glasi:

1. Dom naroda Parlamentarne skupštine Bosne i Hercegovine obavezuje Vijeće ministara BiH, odnosno Ministarstvo pravde BiH i Ministarstvo za ljudska prava i izbjeglice, da u saradnji sa entitetskim i kantonalnim ministarstvima pravde, u roku od 90 dana predlože Parlamentarnoj skupštini BiH na razmatranje i usvajanje državnu Strategiju stvaranja uslova za implementiranje standarda u kazneno – popravnim zavodima na području Bosne i Hercegovine propisanih Evropskom konvencijom o zaštiti ljudskih prava i temeljnih sloboda, Evropskom konvencijom o zaštiti od mučenja i nehumanog ili ponižavajućeg postupka ili kažnjavanja, kao i uslovima propisanim od strane Komiteta Vijeća Evrope za sprečavanje mučenja (CPT), te odgovarajućim domaćim zakonima i drugim propisima,

2. Dom naroda Parlamentarne skupštine Bosne i Hercegovine obavezuje Ministarstvo pravde BiH, da u saradnji sa entitetskim i kantonalnim ministarstvima pravde u roku od 120 dana, u parlamentarnu proceduru uputi cjelovit Program provođenja državne Strategije stvaranja uslova za ispunjavanje standarda u kazneno-popravnim zavodima na području BiH kojim će, pored ostalog, biti razrađeni karakter i načini adaptacije postojećih kazneno-popravnih zavoda, s ciljem da oni u pogledu kvaliteta, broja i kapaciteta zadovoljavaju evropske standarde, a prioritet na tom planu moraju imati kazneno-popravni zavodi u Zenici i Foči,
3. Dom naroda Parlamentarne skupštine Bosne i Hercegovine obavezuje Ministarstvo trezora i finansija BiH da, u saradnji s entitetskim i kantonalnim ministarstvima finansija, u budžetskim projekcijama za 2004. godinu, osigura materijalna sredstva koja će biti dovoljna za provođenje Programa stvaranja standardiziranih uslova u kazneno popravnim zavodima na području Bosne i Hercegovine,
4. Dom naroda Parlamentarne skupštine Bosne i Hercegovine obavezuje Ministarstvo pravde BiH, da putem entitetskih i kantonalnih ministarstava pravde, kao i angažmanom Uprava u kazneno-popravnim zavodima, osigura:
 - Redovno klasifikovanje osuđenih osoba, posebno maloljetnih počinioca kaznenih djela, te da odgovarajućim programima osiguraju permanentnu aktivnost na resocijalizaciji osuđenika, uz ostalo i kroz ostvarivanje prava na rad, kao i dobivanje naknade za taj rad,
 - u roku od 6 mjeseci razriješi problem Odjelenja za provođenje mjera sigurnosti, psihijatriskog liječenja u čuvanja u zdravstvenoj ustanovi, tj. u Odjelu forenzike KPZ Zenica,
 - u roku od 6.mjeseci nacionalnu strukturu zaposlenih u svim kazneno-popravnim zavodima na području Bosne i Hercegovine uskladi sa popisom stanovništva iz 1991. godine,
 - osigura i ujednači zdravstvenu zaštitu u skladu sa odgovarajućim Zakonom i potrebama osuđenika,
 - osigura da svi osuđenici dobijaju hranu koja će po količini i kakvoći biti usklađena s standardima iz Pravilnika, te da se odvoje kuhinje i vrste hrane u skladu sa vjerskim zahtjevima osuđenika,
 - osigura redovno zadovoljavanje vjerskih potreba zatvorenika,
 - omogućiti provođenje odgovarajućih obrazovnih programa za osuđenike i permanentno stručno osposobljavanje za zaposlene kaznionica,
 - osigura smještajne uslove po evropskim standardima u pogledu kvadrature i infrastrukture,
 - pripremi prijedloge legislativnih rješenja i u parlamentarnu proceduru uputi prijedloge propisa koji će utemeljiti izgradnju sistema izvršavanja kaznenih i prekršajnih sankcija usklađenih s evropskim zakonodavstvom,
5. Dom naroda Parlamentarne skupštine Bosne i Hercegovine obavezuje Vijeće ministara BiH da, putem Ministarstva pravde i Ministarstvo za ljudska prava i izbjeglice :
 - prate ostvarivanje Strategije i Programa, te da o njihovoj implementaciji redovno, a najmanje jedanput godišnje, u obliku pisane Informacije informiše Parlamentarnu skupštinu BiH,
 - osiguraju permanentni monitoring stanja ljudskih prava u kazneno-popravnim zavodim osoba lišenih slobode i osuđenika, te da o tome redovno, a najmanje jedanput godišnje, u obliku pisane Informacije informiše Parlamentarnu skupštinu BiH i
 - odredi i stvori uslove za rad stalnog oficira za vezu sa ciljem stvaranja što kvalitetnije saradnje s Komitetom Vijeća Evrope za sprečavanje mučenja (CPT)

6. Dom naroda Parlamentarne skupštine Bosne i Hercegovine se obavezuje da će realizacijom vlastitog Programa rada najmanje jedaput godišnje razmatrati problematiku Stanja u kazneno – popravnim zavodima, te da će prioriteto razmatrati predložena zakonska rješenja iz ovoga područja,
7. Dom naroda Parlamentarne skupštine Bosne i Hercegovine će ove Zaključke dostaviti Predstavničkom domu Parlamentarne skupštine Bosne i Hercegovine sugerišući da i ovaj Dom razmotri naznačene Zaključke i osnaži sveukupnu aktivnost na njihovom ostvarivanju.

Sjednica je završena 15,15 sati.

Sastavni dio ovog zapisnika je neautorizirani transkript sjednice.

SEKRETAR
DOMA NARODA
Jadranko Tomić

PRVI ZAMJENIK
PREDSJEDAVAJUĆEG
DOMA NARODA
Goran Milojević